

池州府志卷第七十六

中憲大夫知江南池州府事加六級襄平馬世永編纂

忠節傳第十九

唐姚顯字尚晦銅陵人不知其仕官所始廣明元年縣志

作乾符中黃巢寇潼關顯拒戰死之僖宗嘉其忠追爵王諡

英烈立廟祀之然其事不見於史今銅陵有姚邨承祀者盡其後裔

宋羅復字無悔鉅陵人登政和二年進士第知胙城縣靖康之難金人逼城下復率縣人力禦之身被重創不去及二帝北狩始被陷南渡後以忠節褒祀縣祠

葉諒建德人開禧三年金人分道南侵諒集義兵拒之
中流矢卒事聞贈武經大夫立祠于所居雙溪

江應洪字泰之青陽人登慶元五年進士第有器識善
邑宰趙方方後帥襄陽辟應洪爲佐方卒攝帥事後知
德安府決數十年疑獄以劇稱擢淮東提刑兼知揚
州元兵大至多方禦之力屈死友人林彥博昇其櫬歸
葬九華西洪嶺之麓

丁黼字文伯石埭人登淳熙十四年進士第授崇德縣
尉遷昇州錄事參軍改知餘杭縣遷太僕寺簿又遷司
農寺丞歲早上封事出知信州軍有修城功轉運使員

秀薦其性本誠實學有師傳修身立朝物論素所推
許今爲郡守曾未數月循良豈弟之政已流聞於四方
遷提點刑獄尋除直祕閣知夔州路嘉定癸未召赴行
在疏急務十條寧宗嘉納之端平三年以四川制置副
使兼知成都府成都逼近寇壘城中兵不滿七百黼累
疏告急暨遣其子詣都堂白其事不報一日元闕端突
以兵薄城下黼出戰不利衆勸其走威茂避之黼口職
在守土將安之悉衆出東門力戰中鏑死後賀靖復成
都始收葬聞於朝贈光祿大夫顯謨閣學士加贈銀青
光祿大夫謚恭愍仍敕建褒忠祠于其鄉從其子鎔請

也妻錢氏贈宜春郡夫人子鎔隨父成都馳入京告急者孫濬將仕郎泌登仕郎兄子鎬承直郎杭州推官黼所著涎溪集五十卷六經辨證疑問諸史精攷燬于兵蘇劉義貴池人性剛躁不可近然能服義終始不失大節幼事呂文德爲部將景定中以鄂州戰守及城鄂常澧州功賜緡錢知吉州軍事咸淳六年與夏松等隸范文虎以舟師十萬援襄陽襄陽失貶廣南尋起從賈似道集兵船于江南北岸戰丁家洲敗績元至元十三年諭陳宜中張世傑劉師勇及劉義等降劉義不從十五年元兵至皋亭山劉義與張世傑劉師勇等挾益廣王出嘉會門渡淞江去楊亮節負廣王昺匿山中走温州陸秀夫與劉義追及之共圖興復及元兵至中軍張世傑與劉義斷維以十餘舟奪港奔硎州昺即帝位拜劉義開府儀同三司殿前都指揮使尋爲檢點少保節度使主管殿前司公事兼諸路經制鎮撫大使廣東西策應大使崖山敗績陸秀夫抱帝赴水死世傑劉義等三十餘艘斬纜乘潮而遁劉義至海洋爲其下所殺子景瞻隨父在行間崖山敗不知所終景由亦隨父官直寶章閣崖山敗遁交趾元兵入交趾以景由歸爲宣城小吏以歿人稱之爲蘇寶章者其職也

清溪二生不知其姓氏當爲貴池人也德祐元年元伯顏下池州州倅趙昂發死之有二生者撫昂發尸哭曰生爲趙氏臣死爲趙氏鬼何以洗此冤清溪一泓水躍入弄水亭下死

明桂經字大經貴池人

間以納粟授真寧都司都

事清邊外侵地擢雲南霑益州知州使八百媳婦市阿魏充貢以誣落職尋復之安賊叛上官檄經招撫經哨牧羊營賊兵突至不屈死之賊平命錄其一子

劉應鶴字玄臯青陽人以儒士爲浙江龍泉主簿遷遼東右屯衛經歷以城守功經略袁崇煥奏擢北直隸永平府通判會永平守將劉興治叛執應鶴應鶴罵之曰國家竭中原膏血以養若屬若屬不能保障邊陲以至於此其不加顯戮曲貸若屬者聖天子法外之仁也乃潛蓄異謀若此吾見大兵一至若屬無噍類矣遂被害事聞優卹之

素國棟字貞幹青陽人天啓中工部營繕所所正歷中府經歷薊遼督師孫承宗知其才奏爲直隸真定府同知署永平知府值用兵山海關國棟多方撫戢兵民使之巡撫方一藻題薦監軍汀南與流寇八戰八捷得賊營所掠婦穉悉放還之督師洪承疇以國棟老於行陣

奏補遼東前屯分練監紀同知守禦松山中流矢卒事
聞贈山東按察司副使

湯九洲號繼山石埭人幼任俠遊京師尚書鄭三俊見
而器之薦授京營小職歷游擊邁遇貴人父田匡宇浸
得擢用崇禎六年六月以叅將領昌平兵赴豫會總兵
鄧玘左良玉周爾敬三家兵追賊混天王於林縣時賊
從林縣走衛輝九洲自涉縣至林縣衝其中堅大敗之
於馬鞍山斬混天王餘賊奔懷濟九洲駐兵水冶阨安
林磁武四州縣之要以備之八月賊爲鄧玘左良玉所
敗回走林縣九洲于陽邑鎮科泉清涼山九龍山王凱

寨原康邨湖南七戰七勝斬獲賊目混天猴等以捷聞
九月賊從五臺復奔豫京營副將倪寵王樸以禁旅尾
其後九洲與良玉以勝兵阨于前賊勢窮蹙大敗于青
店沙岡九洲連戰三日從兩岔口追至安陽夏村旁坐
寨清涼山擒斬無算賊始乘夜走濟源渡河南逸于是
九洲等亦移軍備河南十二月賊寇郟城會日暮大雪
九洲臥軍中撫臣玄默馳至軍登其牀促九洲起擊賊
是夜大勝之于吳城堡追殺五六十里次日及之于橫
山嶺共斬壯賊千餘人由是賊衆悉走入楚河南平時
賊中畏九洲與左良玉曹變蛟等朝廷甚倚重之旋擢

總兵官鎮晉會有蜚語中之者遂削職俾殺賊自効八年遇賊山西力戰死于陣妻賈氏三伏闕以狀聞不報李可受字季度號柱華青陽人自幼厲志節崇禎六年以國學生授陝西澄城縣主簿時流賊蹂躪秦中澄城屢被攻劫可受輒佐其令以死守八年秋賊衆大至度勢不支或勸可受棄城走可受毅然曰位雖卑死吾分也走將奚之及城陷被執不屈死之事聞加優贈卹

蘇瓊字青城石埭人崇禎六年舉應天鄉試七年成進士授北直隸景州知州景州當畿南劇衝多大璫要職瓊每與之抗權貴嫉之調知四川瀘州時流寇張獻忠

寇蜀屢犯瀘瓊守禦甚固不能破而去崇禎十二年月適兵備道黃諫卿夜過瀘啓城諸賊乘之以入瓊即督民兵巷戰力屈被執賊渠脅降之大罵不屈遂被害妻舒氏亦自裁婢僕從死者七人事聞贈太僕寺卿妻贈淑人建祠本邑以祀

余瑀字聿高銅陵人崇禎十四年以貢授湖廣隨州判署州事會流寇擾楚中隨爲賊出沒屢經之路前牧率託故避去瑀署事財八日而賊突至破州城索印不與且大罵遂被害

湯文瓊字兆鼇石埭人性至孝父母歿廬墓以盡毀讀

書曉大義不屑屑於經生家言以貧走京師授徒自給時流寇徧南北加賦給軍而寇日益熾文瓊以布衣憤切時事疏陳重賦爲資盜之原并漕運積弊還舊屯繼軍餉復農務均差徭諸事皆不報崇禎十七年春聞賊渡河而北又陳備禦之策不報三月十八日闖賊陷京師文瓊乃大書報國二字於館壁又書位無文丞相之位心有文丞相之心不必有文丞相之位斷當行文丞相之事數語又書姓名及生平跡略于所服白衣乃自經戒門人勿救越五日面色如生時有賊權將軍劉希閔繫兩大臣經文瓊死處令讀壁間題字詈之曰彼欺言先生且如是爾寧不愧死邪兩大臣但色沮而已文瓊所著有祀言小引及各疏同里沈隆有傳

陳公誥字大誥貴池人幼工文善書法而素貧乏授徒于磚橋張伯純家崇禎十七年三月十九日烈皇帝殉社稷五月初聞變公誥闔戶痛哭久之即自經死人無知之者後同里吳非爲之傳

桂有燧字聚甫石埭人以歲貢授江西撫州府學訓導本朝順治三年我兵入撫州有燧自縊先師廟
吳應箕字次尾號樓山貴池人明季文士闖冗應箕奮起江上高節闊目獨以古學倡天下繼東林勅立復社

為文章出入史漢韓歐者山二蘇間以經學佐世務尤
工策論纒纒數萬言引繩批根所譚論皆中當時之弊
為人魁閎骨鯁由生負為國子監監生憤當世寇亂日
亟時時以一書生與公卿貴官論議國家大事張頤拄
頰辨難蠡起蚪髯飄拂侵客面一語不合輒矯首與爭
視餘子若涕唾搥牀抵几雖權貴人側目勿顧也一時
賢士大夫自大學士范景文吏部尚書鄭三俊以下皆
嚴重之阮大鍼者逆閹魏忠賢遺孽也崇禎時屏居南
京輦金圖起用勢張甚諸無識者潛與關通應箕憤甚
與太學生顧杲陳貞慧倡留都防亂公揭大鍼懼至不
出氣時論韙之後福世子立南京大鍼驟貴官兵部
尚書修舊都刊章捕應箕跳而免我兵下江南應箕與
休寧金聲遙倡義死所著有樓山堂集諸書

池州府志卷第七十六

池州府志卷第七十七

中憲大夫知江南池州府事加六級襄平馬世永編述

守令傳第二十

宋夏中正貴池人南唐時嘗爲諸生黃載作犬羊仙序稱潭倅舊志未詳及入宋知貴池縣以鄉黨不可加刑每聽訟輒隨其曲直諭誡之使無犯法人多化而遷善者尋擢職方員外郎告歸卒孫噩

官

胡舜元字叔才銅陵人其父祖世以貴雄鄉里而推魯

無儒者獨舜元折節好讀書與王安石相友善嘗闢一堂名逢原安石題以詩曰我愛銅官好君實家其間山水相縈帶花卉矜春妍有鳴林間禽有躍池中鮮葉山何嵯峨秀峙東南偏峯巒日在望遠色涵雲邊賓客此鱗集觴飲常留連君家世儒雅子弟清風傳前日闢書堂名之曰逢原有志在古道馳情慕高賢深哉名堂意推此宜勉旃木茂貴培本流長思養源左右無不宜願獻小詩篇舜元舉進士至京師屢不得第欲歸爲其父母壽安石時在朝送之序曰叔才銅陵大家世以賞子弟之豪者馳騁漁弋爲已事勤者務多闢田以殖其家先時邑之豪子弟有命儒者耗其千金之產卒無一邑豪以爲諺笑莫肯命儒者遇儒冠皆指目遠去若浼已然雖胡氏亦然獨叔才之父母不然於叔才之幼捐重幣迎良先生教之旣壯可以遊資而遣之無所靳居數年朋試于有司不合而歸邑人之訾者半竊笑者半其父母愈篤不悔復資而遣之叔才純孝人也悱然感父母所以教已之篤追四方材賢學作文章思顯其身以及其親不數年遂能裒然爲材進士復朋試于有司不幸復誣于不知已不余愚而從之遊嘗爲余言父母之思而慙其邑人不能歸余曰歸也夫祿與位庸者所

待以爲榮者也彼賢者道溯於中而裸之以藝雖無祿與位其榮者固在也子之親矯羣庸而置子於聖賢之途可謂不賢乎或訾或笑而終不悔不賢者能之乎今而舍道德而榮祿與位殆不其然然則子之所以榮親而釋慙者亦多矣昔之訾者竊笑者固庸者爾豈子所宜慙哉姑持余言以歸爲父母壽其亦喜無量於子何如因釋然寤治裝而歸余即書其所以爲父母壽者送之云及父歿舜元又詣鄞請安石爲之志嘉祐四年登進士第歷知德興鄭二縣遷著作郎時安石已秉政舜元甚詆其所行新法乞致仕歸卒安石復以詩輓之孫棣登建炎二年進士第官兵部郎中乘同第建炎二年進士官江寧尉

張璉字伯器貴池人父洵爲獄吏遇冤繫輒籌所以出之者得則飯不得則寢不安璉亦篤於孝友而以能理繁劇稱初令數大邑歷知鳳翔徽宗時以事忤蔡京徵至卒京疑其不死欲發棺檢視賴同里高允文力保免高允文貴池人初爲清流主簿以力救張璉不發棺蔡京多其義授定邊軍教授歷知汀州以廉靜爲治及罷歸蕭然襤被時稱爲長者

鍾鏜字德振銅陵人其家自唐以來同居十一世鏜幼

穎悟如成人及長舉元祐六年進士第宣和三年爲旌
德主簿歷知汀州前後共五十餘年所在著廉惠卒無
遺貲

湯巖起貴池人登乾道六年進士第知營道縣以廉稱
常自勗曰清而死豈不愈于濁而生邪秩滿歸葺寶峯
小圃爲終老計以薦起判徽州即奉祠還里卒所著有
論語義十卷詩集五十卷

葉楠字元質貴池人父蒼有孝行楠登乾道中進士第

按綱必大錄乾道三年過池州鐵券山宿葉蒼會秀才家
蒼有子楠登進士第今志稱淳熙十一年楠登衛涇榜
誤爲鄱陽尉值歲潦楠力請蠲租卹之後爲績溪令多

惠政邑人爲之歌曰前有蘇黃門後有葉令君蘇黃門
者蘇轍也其重楠而擬之子由如此楠所著有知非集
精金訓鑑童蒙記凡八十卷

明陶用康貴池人永樂元年貢授浙江温州府同知以
治行聞擢湖廣衡州府知府

江通字必達建德人永樂十七年貢授河南鞏縣知縣
時民有流亡者通多方安集之俾復故業河南旱飛蝗
徧他縣不入鞏境河南守異之調通捕蝗孟津通往齋
沐禱於神蝗悉去以是聞之朝爲加俸一級俾久任滿
九載以老乞歸蕭然襍被子六人各遺布一疋而已至

今輩有江公祠

鮑旭青陽人宣德七年舉應天鄉試授湖廣均州知州調興國有市人以爭弈相鬪殺人已抵罪繫獄旭廉其誤出之尋葺學宮課士勤民百廢具舉以能聞會湖南諸苗亂上官檄旭統民兵勦之苗平天順元年擢武昌府知府以疾辭百姓多號泣送者

檀觀東流人宣德十年貢授四川永川知縣以廉靜治三載當遷民歌曰食惟檀衣惟檀檀公去我飢寒盡詣闕乞留又三載當遷民又乞留滿九載以治行最擢雲南按察司僉事不赴歸囊止一石人號之曰清白石云

沈通字德亨貴池人景泰三年貢授河南滎陽知縣以清白稱

桂寧號清軒貴池人舉景泰七年應天鄉試授湖廣臨武知縣作士衛民百廢具舉三年以最當遷邑人詣闕乞留復任三年遷雲南安寧知州州民與夷土雜處寧教以善良悉爲感化丁外艱歸遂不復出子經亦以州牧還里偶不當父意輒撻之其嚴毅又類此經另見忠節傳

柯薰建德人父暹爲名臣薰稟廷訓工楷書天順四年貢入北雍以書直翰林院尋授山東霑化知縣勤於民

事偶旱蝗多方捕之蝗滅不爲害復知湖廣安鄉縣市
廬災籲天自責頓返風熄火人皆以爲異秩滿入覲父
老醵金資其行悉却不受覲已乞致仕歸

章廷珪石埭人舉天順三年應天鄉試授江西興國知
縣宜于其民秩滿輒請留任至九載遷贛州府同知致
仕興國人思之立祠以祀

吳必顯字德純號恒菴石埭人成化七年舉應天鄉試
二十三年成進士授江西泰和知縣以勤涖官案無留
牘邑有權貴數輩素恣橫憚必顯悉斂跡遷山西澤
知州修城隍建學校教民樹桑廣育蠶之利遷江西

江府同知湖廣岳州府知府未之官卒

桂鏊字用之貴池人舉弘治十一年應天鄉試以文名
正德中授江西廣信府同知時寧藩蓄逆謀結山中三
卜寇爲支黨巡撫孫燧檄鏊以次勦平之蒙嘉獎尋去
官嘉靖初補廣西柳州府同知適尚書王守仁總督兩
廣諸軍平思州斷藤峽鏊與軍事論功擢思恩府知府
思恩有猺獞八寨每相攻劫鏊至郡興文講武以威信
孚之夷民以戢後致仕歸粵人祠王新建以鏊配焉

劉恩青陽人弘治十三年貢授湖廣長寧知縣有政聲
子圭

陳鈇字公錫貴池人御史仕昭孫也正德八年舉應天鄉試十二年成進士授工部王事歷江西袁州府知府以廉靜治不立赫赫名入覲回即請終養其母在鄉睦婣任恤族黨稱之

柯遷號瀛山貴池人有文名以正德十二年貢授江西彭澤知縣甫下車察奸吏數人置之法問民疾苦徧撫恤之民大悅遷福建泉州府通判興文教儉以勞卒官歸喪無餘物人稱爲清白吏云

柯椿號獨山貴池人嘉靖元年貢授山西吉州同知遷北直順天府通判在官十四稔民謠曰天時久旱柯公之民租久負柯公處之西山多饑柯公賑之西山多柯公寢之徭役紛沓柯公靖之古有惠政柯公近之仕歸閉門息交六年而卒子一勤一儉相友愛與人然人皆稱其有父風云

陳應期青陽人嘉靖二年貢授廣西永寧州知州爲政廉恕民信服之鄰州徭有相仇殺者上官命應期宣諭安撫應期單騎入山曉以禍福羣徭皆羅拜曰如公言吾儕敢梗化乎即時解散凱口賊作亂發六衛軍討之命應期轉餉無後期委清各衛屯田例以千金爲餽應期却不受于是上官稔其廉能交章論薦爲加一級後

乞終養歸卒於里

馬侗字蓮峯貴池人爲縣令教人以善視部民如其鄉而自守廉介不名一錢致仕還後令以餘俸歸之却不受

吳文奇號玄石貴池人舉嘉靖十六年應天鄉試授江西上饒知縣以憂去補河南上蔡知縣陞山東兗州府同知歷著政聲進階一級歸

施宗誼青陽人舉嘉靖二十二年應天鄉試授廣西梧州府同知有劇賊張廉等劫掠爲民害上官檄宗誼討平之欽賞金幣有妖虎噬人尋亦自滅梧民以爲宗誼少所感立祠祀之致仕歸卒於里所著有五經類語

書

謙然字益卿貴池人以選貢入北雍舉嘉靖二十五年順天鄉試授江西廣信府推官善治獄發奸摘伏稱明遷湖廣荊州府同知適江水齧堤謙然悉力加築城工成又以營三殿督採巨材歷著勞績遷兩浙鹽運司同知歸蕭然宦橐在家不治生產人盡高之

劉圭青陽人父恩稱循吏圭以嘉靖二十四年貢授湖廣潛江知縣補江西信豐知縣皆以慈惠著兩地皆建遺愛祠祀之人以爲無忝其父云

檀良翰字少申建德人舉嘉靖二十八年應天鄉試任山西臨縣江西高安兩縣知縣遷順天府通判南京左軍都督府經歷以歸其爲令倅也清而肅凜然莫敢犯者以忤時不得膺仕屢空宴如自安其素視同時通顯數輩夷然不屑也

桂標字汝立石埭人幼讀書熟歷代成敗集有綱目題要天文輯略等編以嘉靖二十六年貢授浙江西安縣丞遷四川巫山知縣值縣大水民多流亡標煮糜以賑并多方招集之始漸復其舊乃竟以瘁卒衆皆憫之有巫陽哀輓錄

柯一鵬字汝程貴池人父相正嘉間名臣一鵬爲冢子幼及家學敦內行事繼母以孝聞撫幼弟及二孤姪極其慈愛析家產自取硤确者以嘉靖三十一年貢授浙江嘉興縣丞甚著勤恪陞四川蘆山知縣蘆山苗多民少叛服不常前令鮮終厥任者一鵬撫綏備至苗民畏懷竟以勞卒卒後陞江西廣信府通判已不及被命矣曹汝良字惟遂貴池人兄汝衷與汝良同入南雍肄業汝良先舉嘉靖三十一年應天鄉試七上公車始謁選授湖廣漢川知縣漢川爲汝良舊遊地嘗曰龐士元不涖茲土幸也至是得漢川舉向所悉利弊興除之期年

大治乃集百姓問之曰今之徭役尚有未均者乎科條尚有未便者乎利尚有未興害尚有未去者乎俱頓首謝曰無有也汝良曰然則吾可以去矣遂致仕歸

潘大承號竹澗銅陵人祖伯庸爲明初名臣大承以嘉靖三十五年貢授廣東保昌知縣卻常例千金爲民興利祛弊無不力及歸以俸餘遍贍族黨年八十猶讀書不輟人至今稱之

曹汝衷字惟和汝良兄也肄業南雍舉嘉靖三十七年應天鄉試授江西德化知縣爲政慈祥刑罰皆從其輕者歉歲加意賑恤民咸德之而尤重文士五年乞休不允陞廣東潮州府通判致仕

孫承祖青陽人舉嘉靖四十年應天鄉試署江浦教諭陞湖廣南漳知縣時採權各處諸物產南漳無所出例輸稅若干金民患之承祖願官爲代納以紓民困上官嘉其愛民爲請於戶部除其稅而練達一切以最聞遷兩浙鹽運司運判不就歸

孫楠號木所青陽人嘉靖四十二年貢授山西廣昌縣丞有風力嘗驅猛虎擒巨獍禱雨立應邑人爲著三異錄以頌之遷廣西興安知縣縣新設諸政未舉楠首葺學宮修武備勸民耕墾由是深箐無伏莽境內大治而

以秩滿歸隱九華山卒

金天民東流人父璉直隸高邑知縣天民能稟家訓以嘉靖四十五貢任山東蒲臺知縣爲民均田里平徭役興學勸農頗著成績因忤上官歸單囊就道抵家後依然儒素也一蒲臺人思之特至其家繪其像以去子澍亦以貢仕河南陝州同知渾亦以貢仕浙江嘉興府通判邑中稱之爲清白吏世家

馮良琛字獻子東流人由例監積官至襄府左長史以禮法佐其王楚中時用兵首輸餉助民間有地畝向爲王府侵佔者令悉返之其胥史恃藩勢滋擾民悉置之法朝論嘉之爲加布政司左參議服俸予誥命

陳忠字大本石埭人例監授四川敘州府經歷以征九絲蠻著勞績擢南溪知縣縣學宮素弗宜其處忠爲擇善地遷之又丈田畝均里甲諸所興除皆合民意遷敘州府通判與征松潘馬湖諸苗洞皆有功三次題敘賜帑金陞山東鹽運司同知致仕

吳文音貴池人舉隆慶四年應天鄉試授浙江臨安知縣多惠政逾年以忤上官歸

柯鏡字公宜號心溪建德人素孝友以萬曆四年貢授貴州銅仁府推官折獄明允署本府及思州俱有善政

查盤遍黔中一介不取值考績獲罪上官謫湖廣長楊
教諭署宜都知縣遷江西吉安府教授歸

汪夢說號四浦貴池人侍郎珊四世孫玉山令士元子
也舉萬曆七年應天鄉試授浙江仙居知縣遷杭州府
同知署知府杭固劇邵簿書委積冠蓋相望夢說接人
以謙處事以敏踰年無不譽之者後致仕歸

李興詩貴池人素醇謹不苟言動以萬曆十年貢仕山
東泰安州州同一介不取至不能給朝夕逾歲卒於官
無以爲殮聞者莫不歎其潔

何自謙字益之銅陵人素博洽羣籍以萬曆十一年貢
授廣東瓊州府通判職撫黎署瓊山安定二縣宜于其
民時朝廷常遣中官至瓊州與羣黎市珍異一激變即
相劫殺自謙每從中調護之得無事後代守入覲回而
黎變大作自謙道聞之疾馳渡海合雷陽三路官兵冒
暑搗黎穴火攻之擒其渠魁十數輩羣黎始帖服自謙
因條撫黎數事上之朝詔如議而以秩滿遷審理及敘
平黎功賜金進階長史致仕所著有夢雪壯遊歸歎濟
偉各集

吳一元青陽人萬曆十四年貢授江西星子知縣最愛
民敢任事有不便於其管內者不憚禍以衛之萬曆末

中人李道以監稅至江西過縣擾甚一元力與之抗道怒誣以阻撓國稅逮下刑部獄星子民哀號詣闕爲一元申辨得釋卒於家天啓三年詔褒先朝冤繫諸臣贈一元尚寶司少卿予誥命

李可芳號念莪貴池人舉萬曆十六年應天鄉試授湖廣鄖陽府推官號敏練遷四川簡州知州湖廣襄陽府同知俱著政績方其仕楚也嘗攜池州糯種以自給至今傳其種爲李公占云

陳文可青陽人萬曆十八年貢授湖廣武昌府通判理商稅每月止徵正額不取餘時中人陳奉以監稅至楚肆虐激變文可極力調護事始解楚人德之後致仕歸卒年九十

柯鑑字公明號誠菴建德人祖燾以戶部員外郎權邦聞爲名宦鑑素孝友以貢舉萬曆二十二年應天鄉試授山東沂州知州州舊有規例及羨賦數千金鑑至悉除之榜示境內由是民流亡他邑者皆相率歸田里鑑又加意撫恤之不數月卒民號泣贈賻以歸其櫬焉子日東

劉芳誤貴池人幼有盛名以萬曆二十二年貢授浙江處州府通判署青田縣事多惠政民無逋賦監造漕艘

於杭州計材程工徧恤軍匠人咸德之擢廣西養利州知州引年歸敦睦族黨周人貧乏爲鄉邦修舉廢墜建清溪二生祠至今傳焉

楊日森字齊華貴池人萬曆十三年舉應天鄉試二十九年成進士授浙江桐鄉知縣多惠政歷五載方報最卒於官百姓哀號罷市以送其櫬歸

桂應蟾號九嶙石埭人舉萬曆二十八年應天鄉試授湖廣衡州府推官治獄詳慎出死囚四十八城東湘江中有石鼓山舊立書院應蟾更勸普之集衡士以時程課焉未幾致仕歸置田於學歲歉出粟賑鄉里而結廬先墓旁隱跡十五載以卒

陳明廷原名明鼇號晴虹青陽人舉萬曆三十一年應天鄉試授陝西寧羌州州有廉名上官七列薦贖遷江西建昌府同知歸兩地皆祠祀之居鄉遇歉歲出粟以賑里人咸多其高誼云

陳明晰青陽人舉萬曆三十四年應天鄉試授內閣中書遷工部主事時天啓間逆璫魏忠賢用事明晰以工役不當其意謫四川大足縣知縣以歸

施臺臣青陽人萬曆三十四年舉應天鄉試天啓二年成進士授福建龍巖知縣縣傍海值紅毛夷入寇臺臣

躬披甲上馬率民兵逐之山谷間寇窘遁邑賴以全向
多逋賦時需餉又甚急臺臣爲去其羨約百姓一月爲
數期赴納不假鞭朴而積逋悉清未幾歸所攜書數卷
而已

馮時來字叔乘號侗夫建德人舉萬曆三十四年應天
鄉試八上公車不得第崇禎元年始就選爲四川江安
知縣以廉靜治土番以兵攻江安時來集民兵嬰城固
守數月賊不能下事聞紀錄一次未幾辭歸孝事其後
母撫二幼弟成立而卒

沈世選字元功石埭人以萬曆四十二年貢入北雍嘗
四十五年順天鄉試副榜授山西絳州同知有廉幹嘗
却額軍銀八百兩又除巨猾之爲民害者解組歸百姓
爲建生祠尸祝焉

施承緒字孺翼號劬菴青陽人天啓年舉應天鄉試
崇禎元年成進士授應天府教授遷南國子監學正太
常寺博士南戶部主事監倉稅革常例裁羨額以清介
聞遷本部郎中出爲福建漳州府知府稱廉平調江西
南康府知府有劇賊踞彭蠡時肆劫掠承緒勦平之未
幾卒於官郡人立祠祀之所著有笥蕉蠶測采芹諸集
金孔器字璉如建德人泰昌元年恩貢崇禎初授山東

蒲臺知縣時有奸人竊踞海島乘間掠旁海諸邑孔器
嚴守備以待之賊終不能犯調江西崇義知縣崇義又
有土賊據山中不時出寇孔器多方設備間以兵擣其
巢斬獲無算賊平擢江西南康府同知南康接楚界多
流寇蹂躪山賊往往爲之應而丞職專勦捕孔器隨宜
撫勦放還賊所掠婦女二千餘人卒保郡境而後致仕
歸蒲臺崇義南康皆立祠祀之

江大任字是人號鮮孺建德人幼孤貧自勵志節舉天
啓元年應天鄉試崇禎十三年授廣東恩平知縣縣多
曠土大任招集流亡給以牛種得墾荒田一千餘頃後
革里役屏陋規民樂其業適會寧諸邑有山賊張甚勢
將乃恩平大任爲誘降其渠魁未幾羣盜犯恩平其渠
魁倒戈戮羣盜羣盜奔境內寧謐乃新學宮興文教始
有登第者又署開平亦多惠政遷雲南南安州知州以
明亡歸恩平開平皆祀名宦子桓

鄭三謨字都甫晚號留菴建德人幼與弟三俊並有聲
賢序三俊早貴三謨益自砥礪天啓四年舉應天鄉試
署休寧祁門兩邑教諭崇禎中遷翰林院孔目禮部司
務時四方多故詔公卿各舉方面才大學士程國祥舉
三謨爲桂林知府不就仍循資累遷南戶部郎中釐度

支夙弊秩滿始遷廣東高州府知府未及暮連署雷瓊
廉三郡巡守道以才能稱十七年某月盜劫茂各獄掠
及府庫三謨倉皇出救猝遇賊死焉郡人三日哭爭相
度材運甓立廟祀之

徐中斗字建伯青陽人崇禎七年貢授福建晉江縣丞
陞湖廣永興知縣恤民愛士秩滿陞雲南鎮南州知州
致仕永興民至今祠祀之

胡士瑾字文瑜貴池人性孝友善屬文崇禎九年舉應
天鄉試十三年成進士授浙江烏程知縣烏程賦素重
士瑾以慈愛軫恤之民以不困尤重士得縉紳先生歡
十五年分較浙閩稱得人十六年調繁烏仁和知縣丁
生父艱歸里適明亡楚帥左良玉兵下江南屯池州士
瑾依池太道劉開文城守甚力鄉里德之尋卒所著散
佚不傳

方學聖字振林貴池人崇禎十二年舉應天鄉試十六
年成進士授浙江秀水知縣縣多豪猾學聖悉以法繩
之一鄉官女杖殺其婢獄具多爲之求貸者學聖不從
竟以女抵罪又一任子索窶人逋而奪其婦學聖追婦
還窶人而解已橐代償其所負焉明亡棄官歸蕭然襍
被至不能給朝夕以卒

陳以運字時可號黃石貴池人蠡縣令桂之孫也性素孝友舉萬曆四十六年應天鄉試七上公車至崇禎十三年始謁選爲江西新淦知縣即言曰治患太周周生大疑治患太剛剛生大畏治患太專專生大闇于是以一廉靜爲治歷五年民大安之張獻忠寇江右湖西諸郡邑無不殘破者淦獨以死守獲全以運之力也福世子僭號江南擢以運福建邵武府同知而江西巡撫曠昭又補咨以運赴考選還池州值楚帥左良玉東下池州戒嚴以運佐兵備劉開文城守鄉人德之本朝下江南屢薦不起卒所著有澄觀堂存橐

史諫字信廷貴池人萬曆四十八年貢崇禎初授浙江桐鄉縣訓導遷貴州印江知縣均丁徭廣廩額抑強弁靖苗氛以老乞休歸入本朝卒年九十餘

本朝羅雲遠字遠伯青陽人明崇禎十五年舉應天鄉試本朝順治四年成進士授山西太谷知縣五年分校晉闈稱得士而多惠政百姓德之

柯仲實字在中號琴泉貴池人以順治五年選貢授浙江新城知縣爲治廉靜革耗羨以勸輸將無催科之役而修建文廟剏興義學歷五年擢河南開封府同知職捕盜爲嚴保甲以弭之一署府又署祥符中牟俱著政

績而濱大河設舟救溺者置義塚瘞亡者隨在好行其
惠焉新城有生祠

汪自潤東流人以順治五年選貢授山西絳縣知縣爲
政寬平與民休息九載邑中無訟擢行人未赴卒

徐文烜字龍山青陽人性敏有文名明崇禎十五年舉
應天鄉試 本朝順治十五年成進士授山西太原知
縣歷著循績卒於官

曹城青陽人以貢歷雲南寧州知州勤於其職康熙三
年土司昌賢等作亂寇寧州誠盡力城守卒被難

章世德字天彝號楓菴貴池人幼穎敏日記數萬言遂
入筆康熙二年舉江南鄉試七上公車至二十一年

成進士授福建南平知縣南平夙苦里排大當役世德
至即除之閱二年值編審凡出甲戶歸原圖者一從民
便絲毫不以私南人德之爲立生祠以寓尸祝而最重
學校月課諸生解橐給膏火又濬泮池建文昌閣新四
賢祠造城外浮橋并大菁縣治具舉百廢焉未幾卒於
官百姓哀號送其櫬尋祀名宦本籍祀鄉賢所著有楓
菴集若干卷子永祚

曹文蔚字仙霞號竒山貴池人幼孤事祖父母與其母
盡孝撫弟妹以友稱長以國子生筮仕河南汝寧府通

判康熙二十一年楚北兵叛餘黨煽汝寧文蔚計禽其魁乃悉解散嘗值季開封決大獄稱平署真陽蘭陽二縣有賑饑修志代民賠河帑諸政以丁內艱去補湖廣德安府通判督修河隄有經畫署武昌府及雲夢羅田二縣俱著美績一日坐堂皇忽遘劇疾卒

池州府志卷第七十八

中憲大夫知江南池州府事加六級襄平馬世永編纂

儒林傳第二十一

明夏遵道號尖山貴池人南唐清溪布衣乾錫之後也幼通五經長書翰孝弟力田與黃侍中觀俱娶於翁爲僚壻洪武間以儒士薦爲池州府學教授能訓士顧不藉援引久不遷建文君即位黃觀欲薦爲講官不可欲薦爲權知制誥又不可欲薦補國子監官又不可靖難兵起觀草詔詆斥成祖遵道每貽書戒以括囊無咎又曰無再履虎尾又曰燕人高皇不能殺青田不能治天

意有歸莫可難也及成祖入南京觀死江上命收觀姻戚而僅罷遵道官不加罪遂隱尖山侶漁樵以卒後郡推李雲作尖山先生傳稱其明哲保身有以也

洪仲遵名道以字行晚號丹崖老逸建德人幼嗜學強記通易春秋尤長詞賦元末嘗舉鄉貢進士不第明初起參田無禽朱文輝軍旣而歸隱郡縣累辟皆以疾辭年六十又以文行薦始應聘領本縣訓導未幾致仕永樂三年改復舊制召諸儒備顧問仲遵年已八十猶應召入朝成祖閱其老不煩以事賜璽牒歸所著有丹崖老集子同安有孝行孫本昌湖廣按察司僉事另有傳方輒字叔誠號止菴青陽人工詩古文永樂中以薦授本縣教諭遷都督府斷事成祖愛其才嘗召入侍一日以詩不稱旨放歸初司訓止巾服至是始給冠帶從輒奏也

吳必聞貴池人永樂六年舉應天鄉試授湖廣潛江縣教諭宣德中遷北國子監學錄克舉其職而謹言慎行動以古道自持君子也所給敕命尚存

程懋字士勉青陽人宋青陽開國公九萬之後也有文名舉正統十二年應天鄉試授湖廣興國州訓導遷直隸平山縣教諭瓊山丘文莊公濬贈之詩曰曾於場屋

見高文此日京華始識君共愛江鷗戲魚藻又驚野鶴
在雞羣諸生夜立高門雪九子秋浮故國雲莫念家園
官獨冷煙花無處不網緼未幾致仕歸於天柱峯下重
建其祖槐之閔肅書堂讀書其內四方多從遊者

丁瑢字德良號無拘久貴池人以成化十三年貢授山
東鄒平縣訓導以憂去起復補湖廣興國州訓導歷七
載訓士不倦所得俸悉資貧生有譚魯者窶甚無居未
授室瑢爲之婚且卜宅焉後瑢歸老於家年八十魯以
御史就官南京便道拜牀下備極敬禮人皆歎爲育士
之報云

高萼字汝實晚號拘齋貴池人善讀書工漆翰舉嘉靖
十年應天鄉試七上公車不第授江西南康知縣以案
牘不勝其煩改教授遷王府紀善歸絕跡不入公府鄉
黨稱之

吳苜號梅臯青陽人兄笈篲外領鄉薦而笈官縣令歸
得痼疾筮當歲薦赴廷試以不忍別其兄辭後十年始
以嘉靖十五年選貢爲湖廣大冶縣訓導遷新城縣教
諭周府教授在官不妄交遊遇英俊之士輒忘年接之
人以此多其善育才焉年八十八卒

陳尚質號野軒貴池人性剛直論事侃侃不少屈於人

以嘉靖十九年貢爲湖廣崇寧縣訓導未幾辭歸作招
隱賦以見志初無子年八十三始生子其家業與姪中
分之族黨咸多其誼云

李奎祥號梅賓貴池人以嘉靖三十年貢授直隸柏鄉
縣訓導遷浙江昌化縣教諭凡所得俸皆以修葺學宮
并資貧生膏火至助人喪葬尤勇爲之不少吝及歸老
與後進接言不及非義以是人咸敬之兩地俱有梅賓
遺愛錄及皆祀名宦

蘇楨石埭人性清剛動遵矩矱以嘉靖三十年貢授江
西南昌縣訓導歷湖廣永明河南臨漳兩縣教諭所至
遺臥碑之訓督課諸生有不率者夏楚隨之士習爲之
一變及歸老其鄉鄉推爲約長每朔望宣講洪武聖諭
六箴指陳愷切一如課士時察有不善者亦必杖警之
其人受杖無敢怨至今鄉里猶頌其遺直焉

柯一鳳號梧岡貴池人舉嘉靖四十年應天鄉試授湖
廣通山知縣以寬治民民有犯不即加以罪必先委曲
開諭之令其改過其逋賦者輒不問以是坐才短改河
南南陽府教授縣人皆涕泣送之至南陽大修學宮遍
周貧士朝夕講課多所成就遷魯府紀善歸

呂一麒號虞田貴池人幼敦學行以同邑李呈祥爲師

丁旦爲友後遊王龍谿鄒東郭兩先生之門步趨繩墨
蘄如也以隆慶四年貢爲河南鄆陵縣訓導歷直隸盱
眙當塗兩縣教諭山東沂州學正所至俱以善教稱盱
眙馮應京其所特拔士也年八十餘卒應京誌其墓焉
王用才號育菴銅陵人素循謹未嘗以意氣加人以萬
曆十七年貢授直隸太平府訓導遷浙江青田縣教諭
直隸松江府教授所歷善教士採錄皆名人貧生以束
脯謁者輒不受年九十餘卒子選亦以貢官直隸祁門
縣訓導其立教悉如其父云

孫繼芳青陽人以萬曆三十二年貢授直隸華亭縣訓
導端方式士與董宗伯其昌陳處士繼儒交最善遷福
建永安縣教諭嘗署知縣事以清慎著卒於官子廷祚
最孝友遠祚天啓元年選貢有文名

丁良策字晉明銅陵人以萬曆四十七年貢授直隸徽
州府訓導遷安東教諭廬州府教授所至善訓士致仕
歸杜門不與外事年八十五猶自作制義訓子弟焉

丁時修字安華銅陵人素醇謹敦行誼嘗殯人喪撫人
孤幼以崇禎二年貢授直隸休寧縣訓導休寧有還古
書院常集諸生講課其內無虛日遷直隸清河縣教諭
江西建昌府教授其訓士皆勤懇有方賴以成就者甚

衆致仕歸著有庭訓正蒙心田諭二編

李元胤字善承貴池人幼穎異善讀書不問家人生產以崇禎元年恩貢中六年應天鄉試副榜授徒自給從遊者數百人年七十二卒

李得春號首川貴池人性沈靜寡言笑績學砥行與人處終日無惰容以崇禎九年貢授直隸海州訓導善訓士卒於官祀府鄉賢子憲懋另有傳

陳自儀號淇園石埭人幼任俠一友陷冤獄自儀挺身爲號學使者白之以崇禎十五年貢授直隸建平縣訓導昔學宮課文藝士之貧不能治業者悉資給之至今猶公其德

本朝胡奇字常之建德人性孝友不苟言行明崇禎六年舉應天鄉試入本朝署壽州學正自如苜蓿而勤於課士有繩檢士無隳隨者迨卒官賻金送其柩歸里孫星祚字堯雲號容山幼能文舉順治十一年江南鄉試署泗州學正善課士康熙十六年遷國子監典籍秩滿應遷乞假歸里述其大父楠理學新傳講學賦詩歷老期卒

池州府志卷第七十九

中憲大夫知江南池州府事加六級襄平馬世永編纂

理學傳第二十二

宋喻樗建德人少慕伊洛之學受業於楊時建炎中登

進士第累官工部員外郎舊志不載見吳非池事未盡錄今補入

明李呈祥字時龍號古源貴池人幼好學有必為聖人

之志年三十九應歲貢赴廷試歸築一軒自署曰尚志

日端坐其中尋孔顏樂處聞王陽明先生倡學江西扁

舟造之辨析同異豁然得良知之旨轉授門徒柯喬丁

旦皆其入室弟子也郡守侯緘陸岡曾仲魁相繼薦其

篤行公卿咸敬慕之時湛文簡公若水爲南吏部尚書嘗過呈祥小丘山隱居題其亭曰神交而爲之記其相契有過于常人者所著述有古源日錄知行二論子敬之亦以歲貢官兗州府通判隨州知州永昌府同知頗著政績蘊之爲鄉善士人以爲克紹家學云

柯喬字遷之別號雙華青陽人幼遊貴池李呈祥之門篤志理學及王陽明先生來遊九華喬迎謁甚見器重即遺之詩曰爾家雙峯下不見雙峯影如錐處囊中深藏未脫穎盛德心愈卑幽人跡多屏悠然望雙峰可以

發深省喬于是豁然悟良知之旨執贄爲弟子既又聞

湛甘泉先生講學南都又往請業焉嘉靖七年舉應天鄉試八年成進士授行人考選爲貴州道監察御史俄外轉爲湖廣按察司僉事駐沔陽築江隄數百里立廛市造浮橋興學校辨冤獄楚人德之尋以憂去服闋補福建按察司僉事時閩浙有倭寇喬備兵海上佐浙撫朱紉勦禦甚力而以事觸權貴罷歸先是喬偕同學在九華山化城寺之右扞陽明書院在中峯扞甘泉書院日與諸生江學曾施宗道輩講習其中而所居雙峯下構雙峯草堂陽明先生有贈侍御柯君雙華長短行曰九華天作池陽東翠微堤邊復九峯兩華亘起鎮南極

一萬七千羅漢松松林繁陰靄靈祕疑有神物通其中
大者孕精儲人傑次者凝質成梁虹盪摩風雷壯元氣
推演八卦連山重大華一百四峯出愈奇芙蓉開遍花
叢叢小華二十四洞華蓋虛連珠纍纍函崆峒雲門高
士禱其下少微炯炯沕漠冲華山降神尼父送寧馨兒
子申伯同三歲四歲貌岐嶷五歲穎異如阿蒙六歲能
知日遠近七歲默思天際窮十歲卓犖志不羈十四五
六詩書通二十以外德義富仰止先覺陟高風謫仙遺
蹟試一蹴文晶吐納奔霓虹陽明山人亦忘年傾蓋獨
斯文宗良知親唯吾道訣荒翳盡歸千峯融千峯不
斷連一脈巖嶸嶮峻咸作容中有兩峯如馬耳壁立萬
仞當九空龍從此起雲潑岫膏霖海宇資化工化工一
贊兩儀定上有丹鳳鳴雖雖鳴雖雖和氣充餐松鬻芝
欲不老飄飄灑逸如仙翁小華巨人跡可以匡天步大
華仙人坂可以登鴻濛雙華之巔真大觀尚友太華峨
岷童俯睨八荒襟四瀆我欲躋攀末由從登登復登安
所止太乙三極羅胸中雙華之居夫子宮至是喬遂終
老其內而復在陽明書院之右自築精舍至郡依李古
源講堂甘泉先生所題神交亭之側築室以居寓不忘
其師之意可謂篤於良知者矣歿學者即精舍為祠以

從祀陽明焉

江學曾字

青陽人王陽明先生至九華學曾即與

同學柯喬施宗道輩從遊與聞良知之旨及湛甘泉先生講學南都乃及門焉九華構甘泉書院實其經紀之力也嘉靖中以歲貢為岷縣訓導遷新建教諭以歿

施宗道字

青陽人與同學柯喬江學曾輩俱從事

於王湛之學者構甘泉書院于九華亦與有力焉

呂一麒號虞田貴池人幼嗜學出李呈祥之門與丁旦

相友善後亦從遊于王畿鄒守益以私淑陽明先生步

趨繩墨斷如也後以歲貢為鄆陵訓導盱眙當塗教諭

沂州學正歸二十餘年卒年八十餘其門人盱眙馮應

京為誌其墓

井一成字起祚建德人素孝友從學于貴池李呈祥之

門與聞陽明良知之旨既又事湛甘泉鄒東郭兩先生

以名宿著嘉靖中以選貢為孝豐靖安二縣知縣俱有

惠政留去思焉

丁旦字惟寅號海暘貴池人生而穎異氣骨朗峻吐音

如洪鍾髫髻時即不妄言動而事父兄尤孝謹聞鄉先

正李古源呈祥賢即款門修贄終身師事之學既通更

出師鄒東郭守益王龍溪畿錢緒山德洪歐陽南野德

諸先正以私淑王陽明先生於是深契良知宗旨而以
其緒餘轉相教授大江以南門徒最盛家素貧伯兄爲
督以所得廩餼束修盡充家用葬父母婚弟姪一切取
辦焉所受先人之廬完葺以遜其兄弟又有吉壤一區
推厝兄嫂不少吝由是里中嚴之雖童稚亦呼爲夫子
耿恭簡公定向督學南畿舉旦文行異等命有司以禮
聘入試監司守令亦常踵其庭咨政治失得旦知無不
言言無不盡而於孝子貞婦力請旌揚遇冤抑居間理
之不令人知也隆慶中一讓恩貢復讓歲貢及萬曆元
年始就歲貢入太學復十年謁選得胡廣衡州府通判
至則却例金釐屏弊復佐其守修社學興義倉與衡人
士講良知娓娓不倦尋督輓至武昌遂監武棘以其間
謁耿恭簡公於黃安山中得寒疾旋衡卒不能具棺殮
士林悲之旦生平務誠信哭師李古源幾盲目爲負土
築其墓又嘗于逆旅殯友人一時爭傳其高義嘗爲文
逐虎虎遁禱雨雨立澍作賦驅山鬼鬼嘯絕聲人皆以
爲至誠所感云其論學也曰惟陽明有功于朱子惟朱
子有靈知陽明之功又曰模稜熟軟以爲圓輒有以病
其方文過飾非以爲中輒有以疾夫正又曰滾來滾去
浪擲半生知是知非本體自在又曰纔仆即硬爭立起

有過即暴白不暎骨力漸堅意味漸暖橫逆平應芻狗
助思又曰千年道脈萬古靈根多為過高承接去了須
從倫物點破令人不疑又曰伊尹放桐之日一毫利害
之心不存周公東征之時一毫毀譽之心不入一刀一
切立地頂天又曰老氏曰虛吾虛無異位育在焉斯能
經世佛氏之寂吾寂相同不離應感造化同功又曰天
理不遠人情造化不逾物則物來順應時動事興可以
覘其所得矣所著有思師錄恭友錄崇基錄及臺省寶
鑑守令寶鑑名相言行略語錄諸書葬貴池縣石都山
之陽耿恭簡公題其碣曰名賢丁君惟寅之墓後以子
紹軾相熹宗累贈光祿大夫太子太保戶部尚書武英
閣大學士

似范字一衡號心坡石埭人少保尚書鏘之仲子也
幼篤學有必為聖人之志長以廕授都事遷經歷歷戶
部員外郎萬曆間命中使採珠寶于滇廣疏請罷之不
報遂棄官歸益研精心性之學與貴池丁旦考究源流
辨析同異每夜分不休嘗於九華山築精舍延四方來
學之士歡欣接引適館授餐雖貧竭不顧也後遭母喪
躄踊七晝夜裂肺而死學者祠之九華山東壁謂之東
壁祠云

羅賜祥字應敬號欽所青陽人幼好學在九華山僧舍習舉子業篝燈夜誦焚其中不自覺山僧稱之為焚中學者閱三歲不一歸其家隆慶四年舉應天鄉試署掖縣教諭分校楚闈遷國子監學正歷都察院及吏部司務兵部職方司員外郎武庫司郎中釐武庫積弊建青陽會館於京師出為湖廣按察司副使分守湖北湖北苗民雜處俗悍而費淫賜祥以簡重馭之衆皆讜服未幾歿其為學也師楚耿恭簡公定向悉本良知宗旨而以主敬為先務不欺為實際可謂跬姚江之閩奧者矣有精舍附九華陽明祠即以陪祀焉

吳邦治字淡所青陽人讀書修行講學宗陽明出其門者盡一時名士時甚重之
王世祿號南溪青陽人素講學宗良知常率門人族子千九華李白祠為講會而讓家業於其弟怡如也所著有南溪遺藁及語錄若干卷以子一楨貴封文林郎贈通奉大夫湖廣左布政使

劉織字章甫號還素青陽人幼從鄉先正吳邦治講陽明之學恨不及親受教于陽明聞旁郡羅近溪查毅齋皆得文成宗旨往贅其門于是領悟其要以主靜為功而極之于不動心焉時九華山陽明書院為六郡之會

織往往爲之主。與金陵焦澹園越郡周海門論說尤相投契。嘗訓其子光復曰：勿以鼎鍾鑠性命，勿以鋸鑊疚身心，則得于良知者深矣。其在鄉，每以孝弟倡立宗祠，設義倉，所最著者也。後以子貴，累封文林郎、河南道監察御史。有還素精舍，傍九華陽明祠，歿即其所祀之，并陪祀。文成。

陳一敏，號少竹，石埭人。素孝友，嘗偕畢心坡于邑中，建陵陽館，祀王陽明先生，即與之講習理學。寒暑無間，歿學者祀之。陽明祠。

方繼之，號文坡，青陽人。幼篤陽明之學，出與李見羅、湯復所。焦澹園諸先生遊，益徹宗旨。所著有語錄若干卷。桂大連，字珍吾，石埭人。幼沈靜，不苟言笑。築古一山房，與同志讀書講學，汨如也。時池人皆宗陽明良知之旨。大連獨究心程朱，暨義真切，而服膺東林高顧之論。儒者躋之，崇禎末卒。所著有心學測易九儒譜略、南北會言九疑問答、首善書院錄、古一山志諸編。

施達，字下之，青陽人。資性明敏，薄舉子業，不爲而獨研精理學。其論以性情爲田，禮義爲柄，博學爲致，知篤行爲誠意，蓋宗良知者也。萬曆末，嘗與楊復所，視無功輩會講金陵。學者翕然宗之。泰昌、天啓間，于九華天柱峯。

池州府志卷第七十九
下築堂舍集門徒講學其內稱天柱先生嘗製大金爲
炊以食學者而于家人日用悉準內則曲禮不苟也崇
禎九年尚寶卿張瑋以隱士薦堪任州縣不赴卒其門
人即天柱講堂洞之所著述有讀書知易信易序卦圖
儒行注孝經注韓文徵天柱志諸編與經書講義並行
於世晚歲更喜作詩古文皆本性情切名理而鏟去陳
言者故士林尤膾炙之

陳自藻字而新青陽人素孝友受業天柱之門爲入室
弟子後亦設講鄉塾廣其師傳歿陪祀天柱

沈元復字青陽人砥勵學行爲天柱入室弟子其
論返博歸約學者宗之又嘗詣臺使者條上採鑛崇妖
媚竈諸弊皆有開風教之言惜未竟其用而歿

池州府志卷第七十九

池州府志卷第八十

中憲大夫知江南池州府事加六級襄平馬世永編述

文苑傳第二十三

宋李植字公立建德人幼能文登熙寧三年進士第元祐間由湖北轉運判官入為尚書度支郎與司馬光呂公著輩共為善類哲宗即位蔡卞輩斥為黨人罷之自撰墓志銘卒

齊天覺字莘夫青陽人家貧好學方夜讀書未嘗解帶就寢倦則一隱几而已自是經史子集靡不淹貫尋舉於州授溫州天官知監秩滿遷知襄陽宜城二縣改奉

議郎贛州僉判

俞夢龜銅陵人方生時其母夢羽士授以黃龜故名生即有齒能言睡寤嘗作讀書聲六歲即通經籍理宗時應童子科問以諸義無不知者授太子正字直祕書監郎文韶貴池人幼博洽多聞由特用官郡丞致仕歸卜築玉臺山麓建聚星樓積書充棟所著玉臺集一卷歿葬杏花邨其子姓繁衍聚族以居至今號其地曰郎家冲裔孫鑑鉉期頤理學詳人瑞錄

元洪義建德人多聞博記于兵農醫卜星曆之書無不研究至正四年舉于鄉授德興分水二縣教諭遷黟縣主簿

馮勉字彥思建德人幼有文筆應天曆二年省試策曰竊謂天下之事不患於不知其弊患於知而不言不患於不言其弊患於言而不改若知而能言言而能改則天下之事無弊矣執事發策秋闈下詢承學首及東南公田鹽利之害愚竊以爲蠲公田之弊在於申明源流之害蠲鹽利之弊在於遵守祖宗之法然皆在於得人而已矣夫歷代田賦若夏之貢商之助用之徹而兼助貢大率皆取于民者什一是時未有如後世之弊魯宣公履畝而稅已爲十而取二自漢而降或三十而稅一

或立爲租庸調之或立爲兩稅之法經制之不
多寡之不齊去古日遠而不得其中正其弊日甚而馴至于
繆宋景定間之公田其弊滋極彼權臣賈似道者謂公
田足以餉邊兵免和糴於是易民田以爲公田公田之
賦倍蓰于民田而又限之以定額饒沃者輸稅僅足而
徒有耕之之苦磽瘠者輸賦不給而民常有終歲之憂
富者以是而日就貧困貧者以是而日就流亡且世爲
之害而莫得以貿易之彼上欺其君而下疲其民以至
於此獨何心哉天朝平定江南田賦之制不求羨餘可
急之征剗除殆盡獨公田之弊有司失于申明奏減昔
之爲政者可坐以不知其弊之罪耳今之爲政
其弊矣何惜一言以救積年之弊以寬一道之征乎若
曰歷年既久厥數猥多則當覈其田之肥磽較其賦之
虛實果可征者而征之果可去者而去之又何難乎其
從哉夫有志于恤民者從義而不從利言而當乎義何
計其身之利不利也又安知吾言之不聽聽之而不遂
改哉在吾盡言之之道耳若知而不言而甘與民胥入
于罪罟此距心之所以自知其有罪而吾勿知其罪可
乎此公田之弊在於申明源流之害也若夫鹽利供國
家之需至廣也然祖宗之制未嘗不以高價椿配急徵

其直爲禁而以罍賣食用從民便爲喻其絜矩之心與
民同利之意爲何如哉昔管仲之所以獲鹽利則亦何
嘗曲爲之防過爲之計而齊用實以富饒其不專其利
而與民同利之意觀其罍可知也稽之於古徵之于今
立法非不善取法非不遠也奈何管計者未盡得人是
以昧于明詔之旨差熟海王之篇動以三犯恐干有司
彼有司者承流宣化民之師帥也而一旦以錙銖之微
利耳目之所不及而笞辱之愚竊爲當今惜也度口計
升月考贏誦此殆具文而往往吹毛求疵少有弛者薄
責隨之亦以資其官吏之貪而重爲州縣之困耳目宜乎
郡縣不得不下虐於鄉都抑配農民占認引數追繫鞭
撻甚於斷趾也彼農民自生自養而宜保之若赤子也
彼凶有攻苦食淡而不能聊生者豈可必以口計其鹽
而獨征其課哉此州縣之所以承其令而重爲吾民害
也口計之非急徵其直可乎謂之能聽從民便可乎誠使
能急徵其直而民不被抑配之苦能必聽從而官不
受三犯之責上不失國家之課下不失官民之心此蠲
鹽利之弊在於遵守祖宗之法也公田而不得其人則
因循苟且而不能以申明其害鹽利而不得其人則貪
昧隱忍而不能以遵守其法必得明理慎行之士而用

之二者之弊庶可以去矣夫急於申明者必曰損上益下民說無疆必曰百姓足君孰與不足而後公田之弊可去而斂從其薄而民用可充已用既充國用安有不充者哉夫謹於遵守者必曰不愆不忘率由舊章必曰遵先王之法而過者未之有也則鹽利之弊不勞而自除矣夫謹正鹽筴而官免其咎官免其咎則民又何以罹于咎哉是故處之之術在於得人而用之則事不終日而理矣幸明良相逢而無異時聚斂之徒以主權利懷仁抱義者將挫堙而為時用矣惟執事審擇焉清廟瑟賦曰倚歎瑟之良予鍾天地之絃英紛何條之場

兮沐風露之清泠立基下謀之既遠予又咸英韶濩其弗逮諒后夔之不遺予顧工倕其安在際有周之盛德兮郁清廟之載歌將需材以製瑟兮宣烈文之至和若有人其采采兮雲飄飄而來下羌剪伐以待用兮豈曰備夫知度邁公輸之準繩兮超郢人之巧妙伉離婁以察微予駢師曠而審調偉姬旦之制作兮仰穆穆而敬止俾聲洪以且舒兮懷徽音其不已藏祀事之孔嚴予殫後王之肅雝若陟降于彼蒼予聲求陽其渾融肇黃鐘以為宮兮迭商角而羽徵二變音之既加兮互周旋而條理上君王而下臣民兮暨事物而有徵表前緒之

耿光兮昭白日之精誠聆幽幽而飛揚兮若鳳凰之鳴
岐又正直而不流兮若詠羔羊而素絲紛陽律既諧于
陰呂兮若睢鳩之在涘又大小之純如子若信厚之麟
趾宜秉德之無斁子儼多士之濟濟也一唱而三歎以
從子信遺音之至美也想其罇鍾兮鏗鏘洛磬兮琳琅
羣音兮翕張總大成而有章大樂作兮萬邦諧天間決
兮地根開百祥兮畢集四靈兮斯來夫瑟列于堂上之
樂其功則浩浩而無涯也客或詰之曰子不聞鼓瑟而
合于軒轅之律呂者彼豈不歌于周文乃徒立於齊門
邪予應之曰瑟之舍于浴沂風兮瑟之用兮歌聖神之

今瑟兮瑟兮與天地相為流通兮客唯而退拔第一

順二年登進士第授韶州路僉判所著有土苴集

明孫玘貴池人幼篤學能文章尤工書法永樂中以薦
其修永樂大典以親老歸養不就官卒及子仁貴贈都
察院右副都御史

孫哲字旣明青陽人性孝友善楷書永樂中貢入太學
後與修永樂大典一中官以佛經強之書哲不可遂辭
歸

章瑩貴池人幼以文名景泰元年舉應天鄉試授東流
縣學訓導以憂去起復補浙江台州府學訓導遷湖廣

宜章知縣稱廉亦致仕歸貧無以爲活賣文自給而已
周昌東流人幼穎異博覽羣書爲文援筆立就人稱之
爲周一掃一掃者言其速也舉景泰四年應天鄉試仕
湖廣荊州府通判卒祀鄉賢

章瑩貴池人與兄璧並有文譽天順三年舉應天鄉試
授湖廣襄陽知縣歲餘不能阿上官投劾歸自號間間
散人以筆墨自給足跡不入公府年八十六卒祀鄉賢
孫溥字博之貴池人有文筆弘治十一年舉應天鄉試
經魁屢上春官不第晚乃謁選爲湖廣通山知縣自持
廉節而悻直不諧俗一日謁監司問其齒出即請老歸
凡碑版文字多溥所作者姪桴舉隆慶元年應天鄉試
授浙江寧海知縣亦以狷介著人以爲有門風云

彭拱號雪泉石埭人自經史百家至星曆卜筮之書參
同契道藏無不研其奧以嘉靖五年貢仕山東東平州
同知歸年九十尚擲管爲詩文不少倦也其門人吳本
義傳其學著八行詩集十卷

章棟號四可書生青陽人幼嗜學貫穿經史其所爲賦
尤名於時舉正德五年應天鄉試仕浙江於潛知縣遷
湖廣沅州知州所著有沙塘晬橐補拙橐

汪文號鳳山東流人幼有文以嘉靖七年貢授廣東感

恩知縣調廣西潯陽知縣遷雲南維摩知州所歷皆持
廉節而雅好文學作士尤多致仕歸纂修東流縣志
劉岐字鳴鳳晚號石溪子貴池人性忼爽總非即工文
兼精衆藝以國子生仕直隸河間縣丞歸築猗園鼓琴
賦詩其內而留心本郡古蹟舊聞必究析原委訂正譌
缺不僅傳疑已也所著有北征詩林下集

劉正蒙字養卿貴池人幼雋永工文辭其歌詩得元和
體以國子生仕浙江湯溪縣丞遷襄府工正歸

何璧號甫溪晚號完齋青陽人素博洽擅文譽而畀以
自牧幼歷鄒守益王畿錢德洪之門及艾猶抑抑如
勝衣也應嘉靖四十一年貢當赴廷試以親老不行
學耿恭簡公定向旌之所著有人物志九華山記

甯三聘字

青陽人素窮經邃于性理而賦性狷介

舉萬曆四年應天鄉試再上公車後不復往閉戶著書
以老遇歲歉倡議捐賑鄉里賴以全活者甚衆

孫樾字汝實青陽人幼有文以萬曆四年貢仕河南長
葛知縣歸修青陽縣志及九華山志視他本爲工繕

金宗範字洪冶號二水東流人性孝友具雋才工詩歌
及草書舉萬曆十三年應天鄉試署直隸望江縣教諭
十一上春官不第卒其翰墨因兵燹散亡殆盡間存片

紙必以千錢購之其見重于鄉俗如此

余翹字聿雲號燕南銅陵人父敬中官至廣東按察使
生翹甫四歲授以書即能成誦稍長一目數行遂悉究
經史著爲詩古文皆有根柢臨川湯顯祖見而奇之呼
爲小友萬曆十九年舉應天鄉試屢上春官不第乃治
一舫號浮齋乘之徧訪名勝歸則鋤半畦號學園著書
其內未幾卒士林惜之所著有翠微集偶記白下遊草
浮齋集及傳奇數種論者稱其文類孫樵詩似許渾司
空圖傳奇直逼關漢卿云

柯汝瓚貴池人總制兩廣副都御史相少子也幼沈靜
向戶讀家藏諸書至成腹笥有摘人名地名問之者
應聲以對未嘗少遺誤其爲詩仿謝眺非三唐以下
所可比例也晚歲膺歲薦不仕年八十餘猶手不釋卷
以卒

柯之來字咸虛貴池人祖相以名績世其家之來幼工
文善詩仿中原七子體嘗與丁文恪公紹軾余孝廉翹
同輯池州府志而出之來手尤多後究心理學嘗著文
辨朱陸微義又論湛甘泉諸經解較王伯安爲切當伯
安春王正月辨爲大非儒者多躀其說焉卒年七十九
胡允聘字湛衷貴池人貢入南雍以文爲司成馮夢禎

楊啓元所器乃屢不得舉改北雍舉萬曆四十三年順
天鄉試天啓五年授山西潞安府推官遷廣東廣州府
同知歸閉門息交猶然儒素也所著有公餘存見問易
商若干卷

徐萬春字懋梅貴池人幼篤友愛撫弟姪以有成而善
屬文下筆千言立就性好佳山水嘗讀書無錫所交盡
名流中萬曆四十六年應天鄉試副榜以歿人盡惜之
所著有蕙園集二卷

江大蚪字九初建德人素博洽家多藏書日手一編勿
暫輟而敏于文筆頃刻千言立就其門多問字者所著

佚不傳

吳秉肅青陽人幼嗜學至老不倦而孝友著于鄉里所
著有匏山集

李達字行可貴池人幼擅敏才爲文千言頃刻立就天
啓中遊京師恥作公卿揖客而憤時政皆出魏璫每作
詩文刺之崇禎二年卒年僅四十

汪應明青陽人素博洽工詩文尤篤理學著有陽華集
吳光裕字寬生青陽人性溫栗通經善詩賦精書法自
大篆八分至小楷無不工妙出與焦竑鍾惺輩遊才名
日噪入則謙恭白重人有乞詩文者不少吝而於財貨

汨如也崇禎三年貢五年卒所構申椒園未竟即鬻以爲殮焉著有四書執兩詩經札觀離騷副墨遊梁草申椒園集飲和社草天臺遊記辛酉八月詩明妃曲

李憲字源嘗貴池人性穎敏爲文務刻入或數日不成一字而神理一轉則立就千言崇禎三年舉應天鄉試第七四上公車不第卒憲素孝義扶父喪遇盜刃及其腹不去盜敬而捨之里中饑雖貧煮糜以賑而尤能鑑別人品鄭冢宰三俊主北察諮之臧否不失其當故時以知今日之所著有天啓事實一卷茗糧齋藁若干卷孫象壯字子輶青陽人素博洽善詩歌與吳應箕劉城文名相埒中崇禎十二年應天鄉試副榜

柯日東字朝陽建德人父鑑仕至沂州知州日東少負才名鄉先達皆就之論事尤善草書爲時所珍購而孝友型俗人樂親之年八十餘卒聞巷哭聲所著有彙苑廿及映玉齋集若干卷

本朝王之璘字伯玉號鍾臺青陽人父一植爲楚方伯家世貴盛而沉潛謙退恂恂如處子居平好讀書出交名輩明天啓四年恩貢考授府通判未仕崇禎中郡守欲以賢良薦辭左兵南下之璘出家財募衆城守一邑獲全嘗設義田會田爲族人周貧乏資膏火親知無不

仰給者入 本朝歿歿之日猶焚數千金逋券焉所著
有大易鈞解大易神策補讀書鈔鍾臺集祀邑鄉賢并
祔享九華山太白陽明二祠

姚椽字筆如建德人幼穎異善屬文自明季即有聲藝
苑入 本朝舉順治三年江南鄉試卒

劉廷鑾字得輿又字輿父貴池人父城明末以文雄江
左廷鑾以父爲師又以父命師邑先輩吳應箕盡得其
學其考據核而詳其論著闕而肆其歌詩麗而則一時
壇坫爭推重之康熙元年以恩貢考授州同知年已暮
矣未仕卒所著梅根集若干卷他纂述數百卷詳藝文
子漢系亦輯有獻徵錄及齊山圖畫志

章周貴池人素孝事其父母父母年俱八十餘歿居喪
執禮笑不見齒者三年而偕兄弟爲師友研精經學著
學庸集解義經遵注二編中年親課子姪年七十二夫
婦舉案一日正與子姪論文無病而歿子禮朝早領鄉
薦

江桓字武子建德人少能文見許於鄉先達中更喪亂
棄諸生自閉一室以著述爲事而閔其邑文運中落出
倡茹社以鼓勵之一時稱爲盛事後應邑令聘修輯邑
志卒所著有餅齋集十卷

章希翰號萑林貴池人性敦樸著孝友多識前言往行而謙退自持若不知其學之富者惟與人陳說則津津不少倦學者稱之爲萑林先生年八十餘卒孫世德親授書卒成進士

姜可久字又久貴池人幼受業于邑先輩吳應箕劉城之門能括經史大義其所撰述濡筆立就家素貧教授生徒以自給邑令趙衍禮致之不往曰吾不欲以豬肝累令也所著有斐園詩文集斐園小言及手錄四書折衷四書人物輯略通鑑輯略間風錄斐園筆記

曹繼參字鄮升石埭人性至孝奉母最謹而喜讀書于天官河渠食貨諸書志尤所切究歷聘幕府所爲公移條議皆有裨實用而古文辭原本理學詩直寫性實楷隸行草皆具古法以康熙十三年歲貢授訓導卒所著有一竹居集子有爲登康熙三十二年江南鄉試副榜能傳父業云

危映璧字東園貴池人好學工文章舉康熙十七年江南鄉試授內閣中書舍人卒所著有梳山堂集

曹風字扶三號待廬貴池人幼穎異羣目爲神童長通經史工詩文嘗遊金陵與諸名宿倡和號建初諸子康熙三年詔天下舉行優之士加以旌獎風與焉後遊

中州歸卒所著有菰蒲集天中遊笈待廬存橐讀書管
見大學古本析義論孟或問補注苴山類書廣集

鮑可大字

貴池人少孤撫于其叔于是事叔如父

長工文出遊滇黔蜀悉覽西南山水之勝以發爲詩文
其詩文乃益奇峭過平時晚歸里與劉廷鑾吳非同輯
縣志

王爾綱字紹李建德人幼慧八歲能屬文長通經義工
詩古文辭所著有砌玉齋集選輯有今人詩永二編

沈思倫字契掌別號閑吾子石埭人工文嗜古出師太
平高士湯燕生入延貴池逸民吳非于家塾以資講習

九所業益進而最重交遊矜然諾名輩多樂與交者

所著有閑吾子集若干卷

顧然字伯庸銅陵人性穎異讀書過目成誦甫五齡
客以青菜黃花黑子屬對即應聲云白果紅皮綠肉其
敏捷類此稍長爲詩歌古文詞名噪藝林晚以歲薦授
訓導當其髫年喪母及事父備極孝道處昆弟子姪輩
有貧乏者輒破產周恤里黨稱之開府薛公每加禮焉
所著有石隅集

池州府志卷第八十

池州府志卷第八十

